

## 2 CORINTIOS

### *Pablo Toyase'e Cayaye Acore Corinto Paina*

<sup>1</sup> Yë'è Pablo Maija'quë yë do'ipi Jesucristo jëjo saokuë de'osiquë a'ë. Jaje cani cayë, i jëjo daoquë a'ë caquë. Iye toya ja'hua toyayë, Maija'quë do'iquë Timoteo ja're çoni, Maija'quë tsecohua'ina Corinto daripë pa'icohua'ina cajë, cui'ne Maija'quë paina cajë toyayë, si'a Acaya yeja pa'icohua'ina.

<sup>2</sup> Diusu Maija'quëpi cui'ne Jesucristopi mësarute i coa isiyere cui'ne co'a ju'ima'pë pa'iyere mësarute isijaquë.

### *Pablo Ai Yo'ose'e*

<sup>3</sup> De'oquëre pa'ni Diusu mai Èjaë Jesucristo pëca ja'quëre cañu'u. Jaëpi mai teaye pa'iohua'ire ñaquë oi çocai ja'quërepa, cui'ne jaë api, mai ai yo'ojë oiyere ne yë'huaquë Diusure.

<sup>4</sup> Jaje pa'ina, Maija'quëpi si'aye mai ai yo'ojë oiyere ne yë'huaji, maipi i maire ne yë'huayeje pa'ye yecohua'ire ne yë'huajajë caquë.

<sup>5</sup> Jaje pa'ina, Cristo ai yo'ose'e maini ai pa'iji. Pa'ina, i ja're çoni mai ai yo'oyë. Ja ai yo'oyeje pa'ye cui'ne Cristo do'ija'a jaiye payë, ne yë'hua cuañõeje.

<sup>6</sup> Jaje pa'ina, yëquëpi ai yo'oni, mësarupi ne yë'hua cuañõeje pajajë cui'ne huaso cuañõeje pajajë cajë yo'oyë. Jaje pa'ina, Maija'quëpi yëquëre ne yë'huani, mësarujë ne yë'hua cuañõeje pajajë

caquë yo'oji. Jaje pajë tutu hue'ejë yëquë ai yo'oyejë pa'ye ai yo'oye pa'itojë quëcojajë caquë.

<sup>7</sup> Jaje pa'ina, nuñerepa mësarute cuasayë. Yëquë ai yo'oyejë pa'ye ai yo'ocohua'i cato cui'ne Maija'quë isiye ne yë'hua cuañoñeje yëquë ja're payë, cuasayë.

<sup>8</sup> Maija'quë do'ijë, yëquë Asia yeja pa'i maca ai yo'ose'ere cui'nare cuasajajë cajë quëaye yëyë. Yëquë jaro pa'i maca jëayerepa neñañe pa'ina, quëco tutu mañaje carajani cui'ne ñeje huajëcohua'i maña etayequë cuasama'pë ai yo'ohuë.

<sup>9</sup> Huani jeoja'cohua'ini nejose'ejë pa'iohua'ire nëji'i. Jaje pa'iquëta'are iye yo'ose'e cato ju'isicohua'ire huëoquëna, Maija'quëna quëcoyere ye'yaye paji'i. Co'ye yëquëja'a ne ti'acohua'i a'ë cuasaye pa ja'ñere ye'yaye paji'i.

<sup>10</sup> Maija'quëpi yëquëre huasopi. Jaje huasosiquëpi ja yë'ta'api huasoja'quë api, juti'ne pa'yere pajë. Jaje pa'ina, yëquë ina quëco pajë pa'iyë, ai yo'oye pa'itojë cocaija'quë api cajë. Mësaru secacai do'ire jaje yo'oja'quë api.

<sup>11</sup> Jaje pa'ina, mësarupi Maija'quëre yëquëni cuasajë secacaijëna, cui'ne jai pai yëquëni cuasajë secacaisicohua'i pa'ito, jai pai mësaru a'ë de'oji caja'cohua'i a'ë, Maija'quëre, i yëquëre de'oye ñacai do'ire.

### *Corintona Saima' Do'ire*

<sup>12</sup> Iye yeja paire cui'ne mësarute de'oyerepa si'si peoyepi pa'ijë cui'ne nuñere papi yo'ohuë, caye nëji, yëquëre. Ja de'oye yo'ohuë cuasayepi yëquëre sihuaye pa'iji. Iye yëquë de'oye pa'iye yëquë iye

yeja ta'ñe asayepi pa'iye pahuë. Coa Maija'quë oi isiye cöcaiyeppi jaje paë'ë.

<sup>13</sup> Yëquë mësarute se toya saoye toyama'pë paë'ë, tiñe pa'ye. Coa ai jerepa ñajë asa ti'añe toyahuë. Jaje pa'ina, ñani mësarupi si'aye asa ti'aja'cohua'i a'ë, cuasayë.

<sup>14</sup> Jaje pa'ina, mësaru de'hue ari te'te maca asacohua'ipi, mai Ejaë Jesucristo dai maca yëquëre sihuaja'cohua'i a'ë. Sihuajëna, yëquëpi mësarute sihuaja'cohua'i a'ë.

<sup>15</sup> Iyere cuasaquë du'ru macarepa mësarute sani ñasi'i cuasahuë. Jaje yo'oquë cayaye mësarute do'i ña huasosi'i cuasahuë.

<sup>16</sup> Jaje pa'ina, cuasahuë, du'ru macarepa Macedoniana sai sa do'i ñaquë. Saisiquëpi cui'ne co'iquë tijupë ñasi'i cuasahuë. Ja maca yureta'a mësarupi yë'ë Judea sai ja'a cöcaijajë cuasahuë.

<sup>17</sup> ¿Jaje yë'ë yo'osi'i cuasani coa noni cuasa nëore? ¿Caye mësaru yë'ëpi jaje yo'osi'i cuasa nëoni te'epi cayaye “pasi'i cui'ne nesi'i” cuasaquë caji?

<sup>18</sup> Jaje pa'ina, Maija'quë api, yëquë mësarute te'epi “nesi'i” cui'ne “pasi'i” cuasajë caye pañe ñaquë.

<sup>19</sup> Yëquë Silvano ja're Timoteo ja're cui'ne yë'ë mësarute quëaquë Cristo Jesús Maija'quë mamaquë cato ti te'epi cayayese'le “nesi'i” cui'ne “pasi'i” cama'quë api. Jaje pa'ina, Cristo Jesús cato nuñerepa yo'oquë api, i case'ere.

<sup>20</sup> Jaje pa'ina, si'aye Maija'quë nesi'i ca nëose'le ina ti'api. Jaje pa'ina, Maija'quëre sihuani cayë: “Jaje pa'ijaquë Cristo Jesús do'ija'a.”

<sup>21</sup> Jaje pa'ina, Maija'quëpi jo'ya neni yëquëre cui'ne mësarute Cristo ja're jëayerepa tsioni pa'iye

neji'i.

<sup>22</sup> I tsecohua'ire pa'ë asajajë caquë Maija'quëpi i de'o joyore isipi, mai joñoana. Isiquëna, i joyopi pa do'ire asayë, si'aye Maija'quë isisi'i ca nëose'ere paja'cohua'i a'ë, mai.

<sup>23</sup> Jaje pa'iquëta'are Corintona tijupë saiye pahuë, mësaruni oima'cohua'ini caquë. Jare sani pa'ito mësaruni yo'oyere sañope yo'oye nëiji. Maija'quë asaji, ja yo'oyere coequë. Ja do'ire saiye pahuë.

<sup>24</sup> Yëquë mësaruni asase'ena nuñerepa cuasajë pa'icohua'ini, Mësaruni itire pa'ë cajë asaye yëyere ta'ñeñu'u cajë yo'oye pañë. Yëquë cato yëyë, mësaruni ja're co neñere mësaruni sihuajajë cajë.

## 2

<sup>1</sup> Mësarute oi ëaye neñere coequë tijupë sani ñaño pas'i, cuasahuë.

<sup>2</sup> Yë'ëpi mësaruni quë'rona sani mësarute oi ëaye nesiquë pa'ito yë'ëre nepi sihua ëaye yo'o huasoja'cohua'i a'ni? Jare yë'ë oi ëaye nesicohua'ipi yë'ëre sihua ëaye yo'ocaiye pa'ini!

<sup>3</sup> Jaje pa'ina, jare jaje mësarute toyahuë, yë'ë sani ti'a maca yë'ë oi ëaye neñere jeoni de'huasicohua'i pa'ijajë caquë. Yë'ëpi jaro sani sihuaquëna, mësaruni sihuaja'cohua'i a'ë cuasahuë.

<sup>4</sup> Jaje pa'iquëta'are ja toya ja'hua toya maca cato ai cuasaquë co'a ju'i cui'ne otare paque oi toyahuë. Toyama'ë pa'ë, mësaruni oi ëaye nes'i caquë. Coa ai jerepa yë'ë mësarute joyore papi oiyere iñosi'i caquë toyahuë.

*Co'aye Yo'oquëre Oiyë*

<sup>5</sup> Yë'ëre oi ëaye yo'osiquë pani yë'ëse'ere oi ëaye yo'oye papi cuasayë. Mësarutejē si'ahua'ire oi ëaye yo'opi cuasayë. Ai co'ayerēpa yo'opi cayere co-equë, oi ëaye yo'opi cayë.

<sup>6</sup> Mësarū i co'aye yo'osi do'ire si'sese'e tsoe de'oji, jā ja'ye pa'ijaquë.

<sup>7</sup> Jaje pa'ina, yure cato i tayose'ere saī de'huacani yëhuo huasojë'ë, yo'oquë tēto saiperepa ai oiyepi daima'quëni cajë.

<sup>8</sup> Jaje pa'ina, mësarute señë, cui'naëni ite ai oiyere iñojë'ë, de'oye yo'oyepi.

<sup>9</sup> Jā'në mësarute toyahuë, iye yo'ose'e ayere caquë, mësarupi yë'ë ye'yayere si'aye sehuocaito ñasi'iquë.

<sup>10</sup> Jaje pa'ina, mësarū saī de'huacaiquëni yë'ëjē saī de'huacaiyë. Tayose'e pa'ina, saī de'huacaiye, pa'ina, saī de'huacaisiquë pani, Cristo ña hue'ñana saī de'huacaiyë, mësarū do'ire.

<sup>11</sup> Jaje yo'ojëna, Satanáspi i yëye ti'añe pasipi, maire. Tsoe maipi asayë, i maire nesi'iquë yo'oye.

### *Troasre Pablo Pa'i Ai Cuasase'e*

<sup>12</sup> Cristo coca quëasi'iquë Troas daripëna ti'asi maca jaiye Cristo co'amaña de'oye necati'ne pa'ye ti'ahuë.

<sup>13</sup> Jaje pa'iquëta'are yë'ë joyo sihuayepi peopi, Maija'quë do'iquë Titore ti'ama'ë pa'isi do'ipi. Jaje pa'ina, jāohua'ire saiye caquë pëpani Macedonia yejana sä'ë.

### *De'hue Quëco Saoye*

14 Maija'quëpi maire si'anë Cristo Jesús ja're ñese quëco saoyena saji. Jaje pa'ina, maija'a i cocare pare iñoji, paire.

15 Mai cato Jesucristo ma'ña huëo sēñeje huëo sē pa'iohua'i a'ë. Cristo Maija'quëna huëo sē ma'ña isiyeje pa'ye. Jaje pa'ijë, si'a hue'ña huaso cuañocohua'ina cui'ne ne huesësicohua'ina iti sēñepi ju'aji.

16 Ne huesësicohua'ire cato, iti sēñe tsimare pa'ë. Pa'iquëta'are huaso cuañocohua'ire cato huëo sēñere papi pa'iyë isiyere pa'ë. Jaje pa'ina, ¿nepi iye yo'oyere ne ti'aja'cohua'i a'ni?

17 Yëquë Cristo ja're tsioni pa'i do'ire i jëjo daosicohua'i sëte Maija'quë ña hue'ñana nuñerepa care pajë cayë. Yecohua'i jai pai Maija'quë coca quëa do'ipi curiquë neñu'u cajë yo'oyeje pa'ye yo'oye pañë, yëquë.

### 3

1 ¿Ñeje cani mësarupi asato coa yëquëja'a co'ye jerepa de'oye yo'ohuë, cuasajë cayë a'ni, panita'a yëquë ayere cajë toyacaisi ja'ore mësaruna sani iñoñe pa'iquë? ¿Panita'a yëquëpi, mësaruni yëquë ayere cajë, yecohua'i ñaja'core toyacaijë'ë cajë señe pa'iquë, yecohua'i yo'oyeje?

2 Pani jaje yo'oye, mësaru a'ë, yëquë toya cuañosi ja'huaje pa'iohua'i. Japi tsoe ti'api, yequë ja'hua caraye paji. Jaje pa'ina, mësaru a'ë, yëquë joñoa toyasicohua'i. Jaje pa'ina, si'a pai mësaru pa'iyë asajë ñañë, tiñarepa.

3 Jaje pa'ina, pai ñani tiña asayë, toyani jëjo sao ja'huaje pa'iohua'i mësaru pa'i do'ire. Yëquëpi i cocare quëajëna, Maija'quë huajëquëre papi i joyopi

toyapi, mēsaruṅa quēna toñana tintapi toyama'ë paji'i, mēsaru joñoare pana toyapi, Cristo case'ere.

<sup>4</sup> Jaje pa'ina, Cristoja'a iyere Maija'quēpi necaija'quē api asayē.

<sup>5</sup> Jaje pa'ina, si'aye yēquē yo'o tī'añe Maija'quē isise'e a'ë. Ja do'ire yēquēpi yo'o tī'añe caye peoji.

<sup>6</sup> Jaje pa'ina, ipi yēquēre i huajē ca nēose'ere quēacaicohua'ire nepi. I huajē ca nēose'e cato joyo ayere pa'ë, coa toyasico maca pa'iyē paṅi. Cuañese'e toyase'e cato ju'iñena isiye pa'iji. Joyo aye cato pa'iyē a'ë.

<sup>7</sup> Moiséspi cuañese'ere quēna toñana toyase'ere daquē ñaco ma'ñañerepa daji'i. Daina, Israel paṅi i tsia ña tī'añe pahué, ai ñaco ma'ña do'ire. Ja cuañeñe paire ju'iñena neñeta'a miañerepa de'oyerepa daji'i, miañe sa carajaiñeta'a.

<sup>8</sup> Jaje pa'iyē sēte airepa de'oye a'ni, joyore pana neñere huajēye ca nēose'ere quēaye!

<sup>9</sup> Ja'nē ca nēose'e cato de'oyere pa'ë. Ja yē'ta'a maire nejoñere isipi. Ja cuañese'e tayo yo'o do'ire. Jaje pa'iyē sēte airepa de'oye a'ni Maija'quē huajē ca nēose'e nuñerepa pa'icohua'ire neñe pa'i do'ire.

<sup>10</sup> Ja'nē de'oyerepa ca nēose'epi yure ai de'oyere pana conī ñato ja'nē de'oyerepa pa'ise'epi do'i peoye pōnēpi.

<sup>11</sup> Jaje pa'ina, miañe sa carajaiñeta'a de'oyerepa pa'ise'e sēte, jerepa de'oyere pa'ë, ti paṅi huesē ja'ñe cato.

<sup>12</sup> Jaje pa'ina, iye mai uteyere pajē ti ca'raye peoyerepa cayē, si'aohua'i asa hue'ñana.

<sup>13</sup> Israel paipi miañe yayayere ñama'pē pa'ijajē caquē ēsequē Moisés capi i tsia pē'pēni yo'ose'eje

pa'ye yo'oye pañë, yëquë cato.

<sup>14</sup> Moisés tsia pëpëyeje paye Israel pa'i asa tì'añe pëpësicohua'ipi pa'iyë. Jaje ca nëose'ere ñajëta'a asa tì'añe pa'cohua'i a'ë. Ja pëpëse'e cato nejoñe pa'iji, Cristoni ire papi cajë cuasa do'ire.

<sup>15</sup> Ja yë'ta'a Israel pa'ipi yure iye mu'seña Moisés cuañese'ere ñato ñohua'i asayena pëpësicohua'ipi pa'iyë, asa tì'ama'pë pa'icohua'ipi.

<sup>16</sup> Jaje pa'iquëta'are pa'ipi Cristona sehuoto ja pë'pëyepi peo hue'ña ne huesëji.

<sup>17</sup> Jaje pa'ina, mai Ëjaë cato joyo api. Jaje pa'ina, Ëjaë joyo pa'i hue'ña cato ta'tëpo ti peo hue'ña'ë.

<sup>18</sup> Jaje pa'ina, mai si'aohua'i mai tsia pë'pëse'e peocohua'i cato tsiña de'huaje pa'iohua'i a'ë, Ëjaë de'oyepi maina ju'aquëna, ññocohua'ipi. Jaje yo'ojë ije pa'iohua'irepa pönëjë saiye, ñ de'oyere si'anëpi jerepa pa do'ire. Jaje pa'iohua'i pa'iyë, Ëjaëpi, joyo sëte yo'o do'ipi.

## 4

<sup>1</sup> Jaje pa'ina, yo'o jujaye peoyerepa necaiyë, Maija'quëpi teaye yëquëre ñani oi iye co'amañare necaijë'ë caquë cuañe nëouna.

<sup>2</sup> Jaje pa'ina, yëquëpi si'aye yahuerepa huajëya'ye co'are paji cahuë, tañe cayepi pa'ire cosoñu'u cajë. Cui'ne Maija'quë cocare tañe pönani yeque ye'yañu'u cajë yo'oye pañë. Jaje yo'oma'pë coa ai jerepa nuñere pase'e asani yo'ojë pa'iyë, Maija'quë ña hue'ña. Ja yo'oyere si'aohua'i nuñerepa yo'ocohua'i a'ë cuasajajë cajë.

<sup>3</sup> Jaje pa'ina, huaso coca yëquë quëayepi yecohua'ire jëaye asa ëa ma'ñe pa'ini jare ne



huesësicohua'ini jaje pa'iji.

<sup>4</sup> Jaje pa'ina, Iohua'i sehuoye coe do'ire iye yeja cuañe diusupi iohua'i asayena ne pore huesopi Maija'quë pa'iyë aye iñoquë de'oquërepa Cristo de'o coca miañere ña tì'ama'pë pa'ijajë caquë.

<sup>5</sup> Jaje pa'ina, yëquë ayere quëama'pë pa'iyë. Coa ai jerepa Cristo Jesús ayere quëayë, mai Ëjaëre pa'ë cuasajajë caquë. Yëquë cato mësarute necaicohua'i a'ë, Jesure oi do'ire.

<sup>6</sup> Jaje pa'ina, iye yeja miañe nequëpi mai joñoana Maija'quëpi miañe necaji'i, yecohua'ire iñojajë caquë. Maija'quë jaje necaji'i, maipi Jesucristo ayere ye'yejë ire cui'ne i de'oyere pare asajajë caquë.

*Necaiquëre Pare Asajë Pa'iyë.*

<sup>7</sup> Ja asayere jai do'i a'ë. Jare maina payë, soto cua'conoa ayayeje pa'ye. Maija'quëpi maina tutu peocohua'ire isipi, ja asaye. Maija'quë tutu a'ë asajajë caquë. Pañi, pañi tutu.

<sup>8</sup> Ja tuture pajë, jaiye ai yo'oye pa'itoje de'hue yo'o jujama'pë pa'iyë. Ja tuture pajë jaiye co'a ju'iñe pajëta'a me neja'cohua'i a'ni cuasayere peoyë.

<sup>9</sup> De'oye pa'iyë peoye josa yo'oyë, maire. Jaje yo'otoje jecococohua'i pa'iyë pañë. Ne tañë, maire. Jaje pa'iquëta'are ne huesoye pañë.

<sup>10</sup> Jesús ai yo'osiquëni ite huajo yëjë yo'ose'eje pa'yepi si'anë maire huajo yëcohua'ipi pa'ijëna, ai yo'ojë pa'iyë, Jesús pa'iyere iñoñu'u cajë mai pa'iyëja'a.

<sup>11</sup> Jaje pa'ina, mai huajëcohua'i pa'icohua'ipi si'anëpi ju'iñëna isisicohua'ipi pa'iyë, Jesús do'ire,

mai ju'i capëa hue'eyeja'a i pa'iyere iñoñu'u cajë jaje pa'iyë.

<sup>12</sup> Pa'ijë Maija'quë cocare quëa do'ire ju'iñepi ja'ye pa'iji, yëquë. Jaje pa'ijëta'a cui'ne mësarupi pa'iyepi ti pa'iyena tì'ahuë.

<sup>13</sup> Maija'quë toya pëpëpi caji ñeje yequë hue'ña: “Pa'ire paji cuasaquë ja do'ire quëahuë”. Jaje pa'ye cui'ne yëquëje pa'ire paji asajë quëayë.

<sup>14</sup> Jaje pa'ina, asayë, Maija'quëpi ju'isiquëre Cristore huajëquëre huëopi. Cui'ne yëquëreje ju'isicohua'ini huëoja'quë api, Jesús ja're. Huëoquë cui'ne mësaruteje huëoni yëquë ja're conì te'e i quërona saja'quë api, asayë.

<sup>15</sup> Jaje pa'ina, si'aye iye yo'oye pa'iji, mësarü de'oye pa'iyere caquë. Jaje pa'ina, Maija'quë jaiye de'oye pa'iyë jerepa pa'ire isiyeje pa'yerepa cui'ne ite de'oyerepa yo'o u'ni cajë pëpacohua'ijë jai pa'ijajë caquë jaje yo'opi.

<sup>16</sup> Jaje pa'ina, yëquë coa yo'o jujahuë cuasaye pañë. Iño ëmëje'e capë cato aiohua'i de'onije jeto sa'nahuë cato mu'seña ñape huajëcohua'i de'ojë pa'iyë.

<sup>17</sup> Jaje pa'ina, iye yeja yëquë ai yo'oye cato coa da saiye a'ë. Jaje pa'ina, ja ai yo'oyepi ti pani huesëye ai jerepa de'oyere pa ja'ñere necaiji.

<sup>18</sup> Jaje pa'ina, yëquë cato cuasama'pë pa'iyë, ñaco ca ña tì'añere. Coa ai jerepa yëquë cato cuasayë, ña tì'a ma'ñere. Si'aye ña'ne cato coa carajaiñe a'ë. Jaje pa'iquëta'are ja yë'ta'a ña tì'a ma'ñe cato ti pani huesëye a'ë.

## 5

<sup>1</sup> Mai cato huë'eje pa'iohua'i a'ë. Ca'ni huë'eje

pa'iohua'i a'ë. Coa esa tēto saicohua'i a'ë. Jaje pa'ioipi iye huë'e ne huesēto, Maija'quēpi ti pani huesē huë'erepa ne de'huasiconi payē, jeto ma'tēmo, pa'i jēñapi nema'a huë'ere.

<sup>2</sup> Jaje pa'ina, ma'tēmo huë'ere pa'i ëa ju'iñē, ja yē'ta'a iye yeja huë'ere pa'ijē.

<sup>3</sup> Jaje pa'ina, ja huë'epi maire caña suña toçaiyeje pa'ye suñaja'coa, capē pejë peoñoaje pa'ye paja'cohua'ire.

<sup>4</sup> Jaje pa'ina, yure cato iye capē carajai huë'ere payē. Pa'ijēta'a ma'tēmo huë'ere ti pa'i capēre pa'i ëa ju'iñē. Coa iye yeja ca'nipi huë'e nesico ne huesēyere caye pañē. Coa ai jerepa ti ne huesēma' huë'ere pajajē cajē cayē, iye ju'ija capēre ti pa'iyena ne huesējaquē caquē.

<sup>5</sup> Jaje pa'ina, iye pa ja'ñe cato Maija'quēpi ne de'huacaji'i. Cui'ne jare ipi i de'o joyo maina isipi, yequē mu'se isi ja'ñe iñoñe.

<sup>6</sup> Jaje pa'ina, itire cuasajē ca'raye pañē, yēquē. Jaje pa'iquēta'are asayē cui'ne, iye capēre ja yē'ta'a pa'iyē cato so'ore pa'iyē, mai Ējaēre.

<sup>7</sup> Jaje pa'ina, yure ite ñañe pañē. Jaje pajēta'a pa'ire paji cuasayeja'a asajē pa'iyē.

<sup>8</sup> Jaje pa'i do'ire itire cuasajē ca'raye pañē. Jaje pa'ina, coa ai jerepa iye capē pa'iyere jeoni etani sani Ējaē quē'rona i ja're pa'iyē yēyē.

<sup>9</sup> Jaje pa'ina, si'anē Ējaē yēyese'e yo'oyere yēyē, iye capē pa'iyere jeonije, panita'a ini ja yē'ta'a tuinije iye yejare pa'ijē.

<sup>10</sup> Jaje pa'ina, iye yeja ja yē'ta'a pa'i maca de'oye panita'a co'aye yo'ose'eje pa'ye pa'i ñape isi cuañoñere cajē, si'aohua'i Cristo pa'i ñape iye yeja

capëpi yo'ose'e ne de'hua hue'ñana saiye pa'iji.

### *De'oye Pa'i Coca*

<sup>11</sup> Jaje pa'ina, Èjaëre pare ai ca'raye asayë, yëquë. Jaje asa do'ire paire yëhuoyë, sehuojajë cajë. Si'aye yëquë pa'ie Maija'quë ñaji. Jaje cui'ne mësarujë yëquë pa'ie asa tì'ajajë cajë uteyë.

<sup>12</sup> Jaje cani cama'pë pa'iyë, tìjupë yëquëja'a co'ye jerepa pa'iohua'i a'ë cuasajë. Coa ai jerepa yëquë cato isiyë, mësarute sa'roje pa'ioire mësarupi yëquëre de'ocohua'ire pare pajë sihuajajë cajë. Sihuacohua'ipi yecohua'ire joyorepa pa'iyepi yo'oma'pë coe ëmëje'ese'e yo'oyere sihuacohua'ire sañope cajajë cajë cayë.

<sup>13</sup> Jaje pa'ina, yëquëpi cuepeohua'ijë pa'iohua'i ña cuañoñi Maija'quëni necai do'ire jaje ña cuañoñë. Jaje pa'iquëta'are cuepeohua'i ña cuañoñë pañi mësaruni necaijë pa'iyë.

<sup>14</sup> Jaje pa'ina, te'i Cristopi si'aohua'i do'ina jucacaji'i asasi macapi Cristo oiyepi yëquë pa'ie cuañequëna, pa'iyë. Jaje pa'ie sëte si'aohua'i i'ja're cöni ju'isicohua'ipi pa'iyë.

<sup>15</sup> Jaje pa'ina, Cristopi si'aohua'ire caquë jucacaji'i, coa ai jerepa huajëcohua'ipi ini pacacajajë caquë, pañi iohua'ija'a co'ye cuasaye. Jare cuasaquë jüni huëji'i.

<sup>16</sup> Jaje pa'ina, yëquë iye yeja pa' yecohua'ire cuasajë ñañoje pa'ye cuasajë ñaño pañë. Jaje pa'ina, ja'nëre iye yeja pa' cuasajë Cristore ñañoje pa'ye cuasajë ñasicohua'ita'a yure cato jaje cuasajë ñaño pañë, ite.

17 Jaje pa'ina, Cristona tsioni pa'iquë cato huajë pai api. Jaje pa'ina, ai co'amaña cato tsoe nejose'e a'ë, yure pa'iyë cato huajëye a'ë.

18 Jaje pa'ina, si'aye iye Maija'quë yo'oye a'ë. Jaje pa'ina, Cristo do'ija'a maire i cajeohua'ire nepi. Neni maire cuañe nëopi, yecohua'ini i ja're cajeohua'i de'oyere quëacajë'ë caquë.

19 Jesucristoja'a iye yeja pa'icohua'ire yë'ë cajeohua'i de'ojajë caquë Maija'quëpi nepi, iohua'i co'aye yo'o do'ire tsoe sai tosiquëpi. Jaje yo'osiquëpi Maija'quë cajeohua'ire ne cocare isipi, maire, yecohua'ire quëajajë caquë.

20 Jaje pa'ina, yëquë Cristo jëjo daocohua'i a'ë. Ja cato Maija'quëpi yëquëja'a conï mësarute señeje pa'ye a'ë. Jaje pa'ina, mësarute señë, Cristo mamipi Maija'quë ja're cajeohua'i de'oë'ë cajë.

21 Cristo ti co'aye yo'oma'quë paji'i. Jaje pa'iquëta'are Diusupi co'ayere yo'oyeje pa'yerepa Cristore yo'opi, mai do'ire. Jaje yo'opi, Cristo do'ija'a jai do'i mai ite sañope pase'ere peo hue'ña nejocasi'i caquë.

## 6

1 Jaje pa'ina, yure maipi Maija'quë co'amaña co necaicohua'ipi pa'iyë. Pa'ijë mësarute señë. Maija'quë oiye mësarute coa isise'ere coa asani pa'ima'pë nejë pa'ijë'ë cajë cayë.

2 Jaje pa'ina, ipi caji, toyase'ena:  
Ai de'o maca pa'iji. Jaje pa'ina, asahuë, më'ë caye.  
Huaso mu'se pa'i maca më'ëre cõcaë'ë.  
Jaje pa'ina, yure a'ë, huaso cuaño'ñe pa'i sa'ro cui'ne i huaso mu'se a'ë.

<sup>3</sup> Yecohua'ipi yëquë co'amaña yo'oyere co'aye cacaima'cohua'ini cajë yecohua'ire co'aye yo'o iñoñe peoyerepa de'oyepi iñojë yo'ojë pa'iyë.

<sup>4</sup> Jajë pa'ina, si'aye ai yo'oye pa'ina, quëcojë yo'oyepi yëquë Maija'quëre necaicohua'i pa'iyë iñoñë. Co'amaña caraquëna, cui'ne jai caquipëje pa'ye ai yo'oye pa'ina, quëcojë tëto saiye iñoñepi cui'ne,

<sup>5</sup> si'sejëna, co hue'ñana cojëna, jai pai sañope cuijë yo'ojë cajëna, jëa co'amaña neñe, si'a ñami ñajë ñataye, cui'ne ayo ëaye tëto saiye quëcoyepi iñoñë.

<sup>6</sup> Cui'ne yëquë de'oye nuñerepa pa'iyepi, yëquë nuñerepa coca ta'ñe asayepi, yëquë quëcoyepi, yëquë de'oye yo'oyepi, yëquë ja're Maija'quë joyo pa'i do'ipi, yëquë paire oire pajë yo'o do'ipi,

<sup>7</sup> yëquë nuñerepa cocare quëa do'ipi, yëquë ja're Maija'quë tutu pa'i do'ipi iñoñë. Jajë pa'ina, nuñerepa yo'o uihua ja'ñepi ñese nehuë, cui'ne jare itipi sañope yo'oyeje jëahuë.

<sup>8</sup> Jajë pa'iquëta'a yecohua'ipi yëquëre sihuasicohua'ipi, yëquëre ñaño coesicohua'ipi yecohua'ipi yëquëre de'o pai a'ë casicohua'ipi, yëquëre co'acohua'i a'ë casicohua'ipi yo'ojë. Jajë pa'iquëta'are yëquë cato nuñerepa pa'icohua'ipi, cui'ne nuñerepa cacohua'i a'ë, yecohua'ipi cosocohua'i a'ë catoje.

<sup>9</sup> Yecohua'ipi yëquëre ñama'cohua'ire yo'oyeje pa'ye yo'oyë, noni ñacohua'ita'are. Yecohua'ipi yëquëre ju'lijacohua'i a'ë cacohua'i a'ë. Cajëta'a huajëcohua'ipi pa'iyë. Si'seyë, yëquëre. Jajë pa'iquëta'are huani jëoñere pañë.

<sup>10</sup> Oiyere pajë pa'iyë. Jajë pa'iquëta'are si'anëpi sihuajë pa'iyë. Ti peocohua'ije pa'iohua'i ña

cuañoñë. Jaje pa'iquëta'are jai paire jaiye co'amaña paye necaë'ë. Co'amaña peocohua'i ña cuañoñë. Jaje pa'iquëta'are si'aye payë.

<sup>11</sup> Maija'quë do'ijë Corinto pa'icohua'i mësarute yëquë nuñerepa cahuë, ti yëquë joña cuasaye yahuema'pë.

<sup>12</sup> Jaje pa'ina, yëquë mësarute yahuese'e ti peoyë. Jaje pa'iquëta'are mësarü a'ë, yëquëre yahuese'e pacohua'i.

<sup>13</sup> Jaje pa'ina, mësarute mamajëre pëca ja'quë señeje pa'ye señë, mësarü cuasayepi yë'ëre nuñerepa cajë'ë caquë, yë'ë mësarute yo'oyeje pa'ye.

### *Mai Cato Maija'quë Huë'e A'ë*

<sup>14</sup> Tsioma'pë pa'ijë'ë, sehuoma'a paire. Jaje pa'ina, ñajë'ë, nuñerepa yo'oye ti tsioye peoji, nuñe yo'o ma'ñe ja're coní. Cui'ne miañeje ti tsioye peoji, neañena coní.

<sup>15</sup> Cristopi huati ja're te'e yo'oye paji. Sehuosiquëpi sehuoma'quë yo'oyeje cui'ne te'e yo'oye paji.

<sup>16</sup> Jaje cui'ne Maija'quëre se huë'e tjo pa'ina, cui'ne tjo pa'iji, coa de'huasi diasure se huë'eje, te'e cui'ne yo'oyeje peoji. Jaje pa'ina, Maija'quë huajëquërepa huë'e a'ë, mai. Jaje pa'ina, ipi capi, ñeje:

ïohua'i ja're coní pa'i, ïohua'i ja're cusi'i. Yë'ëpi ïohua'i Diusu pa'ijaquë a'ë.

Cui'ne ïohua'ipi yë'ë pairepa pa'ija'cohua'i a'ë.

<sup>17</sup> Jaje pa'ina, mai Ëjaëpi caji:

Jaohua'i jopo pa'icohua'ipi etani,  
jaohua'ire tsioma'pë,

cui'ne si'siję pu'pema'pę pa'iję'ę.

Jaje pa'ijęna, yę'ępi męsarute sihuaquę imasi'i.

<sup>18</sup> Imani męsaru ja'quę pasi'i. Pa'ina, męsarupi ęmęohua'i cui'ne nomiohua'i yę'ę mamaję pa'ija'cohua'i a'ę.

Jaje caji, ęjaęrepa si'aye tutu paquęre papi.

## 7

<sup>1</sup> Jaje pa'ina, Maija'quę do'iję maņa iye a'ę, maire ca nęose'e mai paye. Jaje pa'ina, de'ocohua'irepa paņu'u, si'aye capę, cui'ne joyo si'si neņere yo'oma'pę. Ja pa'iyere caję Maija'quęni ca'raję si'aye mai pa'iyę ina isi saoni paņu'u.

### *Corinto Paj Ponęņę*

<sup>2</sup> ıDe'oji. Jaje pa'ito yęquęre sihuaję tsioję'ę! Te'ireję yęquę co'a de'huama'cohua'i a'ę. Te'ireję yęquę care payeję caję cosoma'cohua'i a'ę.

<sup>3</sup> Jaje cani, męsaruni nuņę yo'oma'cohua'i a'ę caquę cama'ę pa'iyę. Jaje pa'ina, tsoe męsarute cahuę. Męsarute yęquę joņoare papi oiję pa'iyę, yęquę huajęcohua'ipi pa'ijęna, cui'ne ju'itoję.

<sup>4</sup> Jaje pa'ina, yę'ę męsaru de'oyerepa sehuojaję cuasaquę si'aye yę'ę cuasayere caye payę. Cui'ne męsaru do'ire ai sihuayeję payę. Jaje pa'ina, si'aye ai yo'o jopopi ai sihua joyo payę, męsaru do'ipi.

<sup>5</sup> Yęquę Macedonia ti'asi macapi ti huajęma'pę paę'ę, a'ri maņaje. Si'a huę'ņa ai yo'oyese'e ti'ahuę, yęquę quęno macapi saņope yo'oyese'e paji'i. Jaje yo'oye pa'ina, yęquę joņoapi quęquę huesęsicohua'i paę'ę.



6 Jaje pa'iquëta'are Maija'quë co'a ju'icohua'ire yëhuo huasoquëpi yëquëreje cui'ne yo'oquëna, sihua ëaye nepi, Tito daiyepi.

7 Jaje pa'ina, i daisi mañase'e sihua ëaye neñe papi, mësarü sihua ëaye ite yo'ose'e quëaquë, cui'ne mësarü yëquëre ña ëa ju'iñeje quëaquë, cui'ne mësarü oijë pa'iyë se quëaquë, cui'ne yë'ëre ai cuasajë co'a ju'iñe quëaquë yo'opi. Jaje quëaquëna, si'aye iyepi yë'ëre ai sihua ëaye nëji'i.

8 Yë'ë toyasicopi mësarute ne oesico pa'itoje, itire cuasaquë oima'ë pa'iyë. Ja'në cato oë'ë, yë'ë toyasicopi mësarute a'ri tëcahuë ne oecona, ñaquë. Jaje oisiquëje yure cato sihuayë.

9 Sihuama'ë pa'iyë, mësarute ne oesi do'ire, yë'ë cato sihuayë, ja oiyepi mësarü yo'oye jëoni Maija'quëna pönëne necaisi do'ire. Jaje pa'ina, Maija'quëpi sihuaquë ñapi, mësarü oijë quëcojë yo'oye. Jaje pa'ina, yëquë toyase'epi mësarute co'aye nema'pë paë'ë.

10 Jaje pa'ina, joyo oiye cato tiñe pa'iyë pönëñena cui'ne huasosicohua'i pa'iyena saye a'ë. Jaje pa'iquëta'are iye yeja pai yo'ojë oiye cato, ju'iñena saye a'ë.

11 Jaje pa'ina, ñajë'ë, yure Maija'quë yëyeje pa'ye yo'ojë oise'epi etase'ere. Iye a'ë, iti etase'e: Ësa co'ayere ne de'hua ëaye nëiñe, mësarü aquë co'ayere yo'osi do'ire huajëya'ye nëiñe, co'aye sañope cama'cohua'ita'are huajëya'ye nëiñe, co'ayere yo'osiquëpi pönëjaquë cajë ai yo'oye nëiñe, co'aye yo'oquëre si'seye pa'iji cuasaye nëiñe, mësarupi, si'ayere de'oyerëpa yo'ohuë, nuñerepa yo'ocohua'ipi.

12 Jaje pa'ina, yë'ë ja toya ja'hua toya maca

iti co'aye yo'oquëni panita'a iti co'aye yo'o  
cuañoquëni caquë toyaye pahüë. Coa ai jerepa yë'ë  
cato mësaru yëquëre co'a ju'ijë pa'iyepi, Maija'quë  
ña hue'ñana ñañe pa'ijajë caquë toyahuë.

<sup>13</sup> Ja cato yëquëre ne yë'huaye pa'iji.

Jaje pa'iquëta'are iye asa yë'huase'e jerepa ña  
huajëhuë, mësaru de'oye pa'ijë pa'icohua'ire ña  
do'ire Tito sihuaquë pa'iyere.

<sup>14</sup> Jaje pa'ina, mësaru ai de'ocohua'i a'ë caquë  
Titore tsoe quëahuë. Titopi yë'ë mësaru ayere  
quëase'e nuñere pa'ë caquë asa ti'api, mësaru  
de'oye pa'ijë pa'iyere ñaquë. Asa ti'acquëna, co'a  
ju'iñe peoyë, mësaru ayere cato yo'oma' do'ire.  
Si'aye mësarute yëquë quëase'e cato nuñerepa  
quëase'e a'ë, cui'neje Titopi nuñere pa'ë caquë  
asa ti'api, yëquë quëase'e.

<sup>15</sup> Jaje pa'ina, yureta'a ije mësarute ai jerepa yëji,  
si'aohua'i mësaru ite de'oye dahuëre ñajë pëpani  
pajë, i caye si'aye de'oye sehujë yo'ocaise'ere  
cuasaquë.

<sup>16</sup> Jaje pa'ina, yë'ë mësarute ai sihuayë,  
de'oyerepa yo'ojacohua'i a'ë caquë!

### *De'oyerepa Isiye*

## 8

<sup>1</sup> De'oji. Yure Maija'quë do'ijë, mësarute quëaye  
yëyë, Maija'quë oi coa isise'epi Macedonia  
pa'icohua'i sehuosicohua'i yo'o iññere.

<sup>2</sup> Jaohua'i teaye co'amaña peocohua'ita'a  
ëseye peoyerepa sihuajë isihuë, yecohua'ire  
cöcai ja'ñere. Jaiye co'amaña pacohua'i isiyeje

pa'yerepa isihuë. Cui'ne jaiye neñañe pa'ina, têto sainije sihuacohua'i pa'iyë.

<sup>3</sup> Cui'ne yë'ëpi ñahuë, iohua'i de'oyerepa cuasajë ëseye peoyere papi iohua'i payere cui'ne iohua'i paye jerepa isijëna.

<sup>4</sup> Jaje yo'ojë yëquëjë Maija'quë paire cõcaiye yëyë, ësema'pë cajë ai se'ë, yëquëre.

<sup>5</sup> Sesicohua'ipi coa curiquëse'e isiye pajë coa ai jerepa yo'ohuë. Yo'ojë du'ru macarepa Ëjaëna iohua'i pa'iyere isihuë. Ja jeteyo'je isihuë, yëquëna, Maija'quë yëyeje.

<sup>6</sup> Jaje pa'ina, Titore i ja'në yo'o huëose'ere yo'oquë mësaruru quë'roje iye de'oye cuasajë cõcai curi isiye tsi'so saojaquë cajë se'ë.

<sup>7</sup> Mësaruru si'aye de'oyerepa pa'icohua'ipi pa'iyë: Pa'ire paji cuasacohua'ipi, tañe coca cacohua'ipi, tañe asacohua'ipi, de'oye yecohua'ire necaicohua'ipi, cui'ne yëquëre ai oicohua'ipi. Jaje pa'icohua'ipi iyereje cuasajë yecohua'ire têto saisicohua'ipi yo'ojë pa'ijë'ë, peocohua'ire cõcai isiyere.

<sup>8</sup> Mësarute tsepoje pa'iore isiyë, mësarupi yecohua'i de'oye yo'oyere ñani mësarujë, mësaruru nuñerepa paire oicohua'i pa'iyere iñojajë cajë. Jaje pa'ina, mësarute cuañema'pë pa'iyë.

<sup>9</sup> Jaje pa'ina, mësaruru cato tsoe asayë, mai Ëjaë Jesucristo maire de'oye coa isisi'i caquë, jaiye co'amaña paquëpi, co'amaña peoquë de'ose'e, mësaruru do'ire. Mësarupi i co'amaña peoquë de'osi do'ipi, jaiye pacohua'i pa'ijajë caquë yo'opi.

<sup>10</sup> Mësaruru de'oye pa'iyere caquë, iye yo'oye aye mësarute cahuë, yë'ë cuasaye mësarupi ja'në têto

saisi ometëcahuë ai sihuajë de'oye yo'o huëohuë, iye isiye ayere.

<sup>11</sup> Jaje yo'osicohua'i sête yurejê sao macaja'a, jare ocue pa'i maca cuasajë, sihuajë isijë yo'ojë'ë, mësaru paye ja'ye.

<sup>12</sup> Jaje pa'ina, paipi Maija'quëre isiye yëre paquë i paye ja'ye isito, Maija'quë sihuaquë ñacaiquë api. Maija'quë co'amaña peoquëni ñaquëta'a, isijë'ë caquë sema'quë api.

<sup>13</sup> Cama'ë pa'iyë, yecohua'ire cöcai do'ire, mësarupi co'amaña carajani, ai yo'ojajë caquë.

<sup>14</sup> Yë'ë cato cayë, si'aohua'i si'a yë'quë maca co'amaña payere caquë. Jaje pa'ina, yure mësarupi cöcaiye pa'iji, iohua'ire peoyere. Cöcatena, cui'ne yequë mu'se iohua'ipi mësaru peoyere cöcaiye pa'iji, mësarute. Jaje yo'ojë si'a yë'quë maca paja'cohua'i a'ë.

<sup>15</sup> Pajëna, toyase'e cayeje: “Jaiye si'sosiquëre nëañeje papi, cui'ne a'ri maña ts'i'sosiquëreje caraye papi.”

### *Tito Cui'ne Ite Cöcohua'i*

<sup>16</sup> De'oji, cayë, Maija'quëre, Tito joyona yë'ë mësarute ai cuasaquë pa'iyejê pa'ye ai cuasaye necaisiquëre.

<sup>17</sup> Jaje pa'ina, Titopi, yë'ë mësarute sani ñajë'ë caquë seña, de'oyerepa sehuocaji'i. Ipi mësarute ai cuasaquë ña ëa ju'i pa'iyë sête. Jaje pa'ina, yure i yëyes'epi mësarute ñasi'i caquë saiji.

<sup>18</sup> Si'a huë'ña sehuosicohua'i pa'icohua'i quë'rona, huaso coca de'oyerepa necai do'ire de'oquëre pare yëhooquëni, Maija'quë do'iquëre te'ire, Tito ja're cöni jëjo saoyë, mësaru quë'rona.

19 Coa ai jerepa si'a hue'ña sehuosicohua'i pa'icohua'ipi ite sahuareña, yëquë ja're cu'i yëquë yo'oye cōcaija'quëni. Jaje pa'ina, yëquë mai Ējaëre de'oye necañu'u cajë coa isi co'amaña tsi'sojë yo'oyere cui'ne yëquë cōcañu'u cuasaye iñoñu'u cajë yo'oyere, cōcaija'quë api.

20 Jaje yo'ojëna, iye yëquë jaiye co'amaña tsi'soyere, de'oyerepa huahuesi'i cajë yo'oyë, yecohua'ipi co'aye cama'pë pa'ijajë cajë. Jaje yo'oyë.

21 Jaje pa'ina, yëquë cato de'oyere pase'e yo'oye yëyë, mai Ējaë ña hue'ña, cui'ne pai ña hue'ñaje.

22 Cui'ne jaohua'i ja're coní te'e jëjo saoyë, yequëreje Maija'quë do'iquëre. Jaë cato jaiye de'oye yo'oquë yëquëre i yo'oyepi, i nuñerepa pa'iyë iñoquëpi, cui'ne yureje mësarute, nuñerepa pa'icohua'i a'ë cuasaquë api. Jaje pa'ini jëjo saoyë.

23 Jaje pa'ina, yecohua'ipi iquei'ni cajë Titore secohua'i pa'ito quëajë'ë. Jaë cato Pablöre tsioquë api, cui'ne i ja're co'amaña nequë api, mësarute cōcasi'i caquë, cajë'ë. Cui'ne Maija'quë do'ijë i ja're coní saisicohua'ini secohua'i pa'ito cajë'ë. Jaohua'i cato sehuosicohua'i tsi'sini cuasani jëjo daosicohua'i a'ë. Cristöre de'oye necaicohua'i a'ë cajë'ë.

24 Jaje pa'ina, si'a hue'ña sehuosicohua'i ñañere cajë, mësaru iohua'ire nuñerepa oiyere oni iñojë'ë. Jaje pa'ina, yëquë mësaru ayere case'eje pa'ye sihuayë, mësarupi jaje yo'ore paja'cohua'i a'ë cuasajë.

*Maija'quë Do'ijëre Tsisocaise'e*

## 9

1 Mësaru cōcañu'u cuasayere asa do'ire, Maija'quë do'ijëre pa'icohua'ire tsi'soni isi ja'ñeta'a mësarute toyaye pañë.

2 Si'anë sihuaquë cayë, Macedonia acohua'ire, mësaru Acaya pa'icohua'i, ja'në ometëcahuë cōcañu'u cajë cui'ñasicohua'ipi pa'ise'ere pa'ijëna, mësaru de'oye cuasayere ñani, jai paì Macedonia acohua'ipi mësaru esa ne ëa ju'ijë yo'oyere ñani de'oye yo'oñu'u cajë yo'ose'ere cayë.

3 Jaje pa'iquëta'are Maija'quë do'ijëre jëjo saoyë, iye yo'oye aye, yë'ë mësarute de'oye yo'ocohua'i a'ë case'epi coa case'e pa'ima'quëni caquë. Jaje cani cayë, mësarupi yë'ë cuasaquë case'eje pa'yerepa coa isiye ne de'huasicohua'ipi pa'ijajë caquë cayë.

4 Mësarupi ne de'huama'cohua'ipi pa'ijëna, yë'ë ja're yeque Macedonia acohua'ipi cōni sani ñama'cohua'ini caquë cayë. Mësarupi tsi'soyere nema'cohua'ipi pa'ito yëquëre ai huajëya'ye pasipi, mësarute nuñerepa neñë cuasajë sihuajë casi do'ipi, cui'ne mësaruteje jerepa huajëya'ye nësipi.

5 Jaje pa'ina, mësarute du'ru sani do'i ñaja'cohua'ire, Maija'quë do'ijëre jëjo saoyë, jaohua'ipi mësaru coa isiñu'u ca nëose'e cōcaijë tsi'so saojajë caquë. Jaje yo'orena, mësaru coa isiypipi ëseye peoyere papi de'oyerepa cuasajë yo'oyere iñoñe pasipi.

6 Iyere cui'ne cuasajë'ë: A'ri maña tasiquëpi jare a'ri maña tëaye pa'iji, cui'ne jare jaiye tasiquëpi jare jaiye tëaye pa'iji.

7 Jaje pa'ina, paì ñape isiye pa'iji, joyo cuasase'le ja'ye, isima'pë pa'ijë'ë co'aye nëi joyopi, panita'a

yecohua'ipi cuaeñejëna. Jaje pa'ina, Maija'quë cato oi ñacaiquë api, sihuaquë isiquëni.

<sup>8</sup> Jaje pa'ina, Maija'quëpi mësarute si'a mu'seña coa si'a co'amaña jaiye isija'quë api. Mësarupi si'aye mësarute caraye pajë nëaquëna, si'aye de'oye yo'o co'amañare cōcaija'cohua'i a'ë.

<sup>9</sup> Jaje pa'ina, toyase'e caji:

Co'amaña peocohua'ire ëseye peoyerepa isisiquëre cato,

I nuñe yo'ose'e ti pani huesëji.

<sup>10</sup> Jaje pa'ina, Maija'quë mai ta ja'ñe, cui'ne ai ja'ñe isiquëpi si'aye mësaruta ja'ñe, cui'ne mëa ja'ñe necaija'quë api. Necaina, mësaruta ësema'pë isiyepi jaiye nuñerepa yo'oyere tëaye pasipi.

<sup>11</sup> Jaje yo'ojëna, Maija'quë mësarute jaiye co'amaña isija'quë api, peocohua'ire cōcaijajë caquë. Ja tsi'soni jëjo saoyere jai pa'i Maija'quë do'ijëpi de'oji cajë Maija'quëre pëpajacohua'i a'ë.

<sup>12</sup> Jaje pa'ina, iye yëquë Maija'quë do'ijëre cōcai ja'ñe sacaini coa iohua'ire carayese'e cōcai ja'ñere saye pañë, coa iohua'ipi ai jerepa Maija'quëre ai de'oji cajë pëpa ja'ñere sayë.

<sup>13</sup> Jaje pa'ina, iye mësaruta cōcaiyepi mësaruta Cristo coca de'oye sehuocaiye iñoquëna, ñajë iohua'ipi Maija'quëre de'oquëre pa'ni cajë sihuaja'cohua'i a'ë. Sihuajë iohua'ije Maija'quëre de'oye yo'oja'cohua'i a'ë, mësarupi iohua'ire cui'ne si'aohua'ire yecohua'irejë ëseye peoyerepa cōcaiyere ñajë.

<sup>14</sup> Jaje pa'ina, Maija'quëpi i oiyere mësarute iñosi do'ire cuasajë ai yëjë Maija'quëre mësarute seccaija'cohua'i a'ë.

15 ¡Jaje pa'ina, Maija'quëre ai de'oji cayë, iye ai de'oyerepa i isise'ere!

## 10

*Pablo Cristo Jëjo Daoquë Sëte I Tutu Payere Case'e*

<sup>1</sup> Yë'ë Pablopi mësarute Cristo a'jiñe yo'oyepi cui'ne i oiyepi cuasaquë, mësarute señë. Yë'ëre cayë, mësarujare pa'ini tutu caye caraquëta'a cayë. Jaje pa'iquëta'a so'ore pa'i toyase'ēja'a irepa cayeje tutu cayë.

<sup>2</sup> Jaje ca do'ire mësarute quëayë, yë'ë mësarute ñasi'i caquë sai macaja yë'ta'api de'oye pa'iyepajë, mësarucacohua'ipi pa'i yëyepi yo'oji cacohua'ire cato tuturepa caju'quë a'ë.

<sup>3</sup> Jaje pa'ire paji yëquë cato pa'i a'ë. Jaje pa'iquëta'are iye yeja pa'i sañope yo'oyeje pa'yepi yo'oye pañë.

<sup>4</sup> Mai uihua co'amaña cato, Maija'quë tutu quë'i uihua co'amaña'ë. Si'aye co'a tutu quëco pa pa'i huë'ñare nejo co'amaña'ë. Jaje pa'ina, mai uihuama'pë pa'iyë, iye yeja pa'i uihua co'amañaje pa'yepi.

<sup>5</sup> Jaje pa'ina, ja uihua co'amañapi, si'aye Maija'quë ta'ñe asaquë yo'oyere, sañope tiñe pa'ye cuasayere nejoñe pa'iji. Cui'ne ja uihua co'amañapi, si'aye mai cuasayere tsi'soni Cristona isiye pa'iji, maipi ite de'oyerepa sehuo ja'ñere cajë.

<sup>6</sup> Jaje pa'ina, si'aohua'i mësarude'oye sehuo-caicohua'ise'e pa'i maca, yëquëpi si'aye de'oye sehuo ma'ñere si'seye tsoe cui'ñasicohua'ipi pa'iyë.

<sup>7</sup> Mësarucato coa ëmëje'e pa'iyese'e ñañë. Jaje pa'ina, yë'ë nuñerepa Cristo aquëre pa'ë asaquë



pani, yēquēreje nuñerepa Cristo acohua'i a'ē cuasaquē ñasipi.

<sup>8</sup> Jaje pa'ina, yē'ēpi yēquē yo'oye pa'iquēta'are seña maca mēsarute cuañequē yo'osiquē panije, co'ayerepa yo'ore'ni cuasaquē ca'raye pañē. Ējaēpi mēsarute nejoñe peoyerepa, jerepa joyo pa'iyere ñese mēocaija'a tutu isiquēre me ca'raye'ni.

<sup>9</sup> Jaje pa'ina, yē'ē toya saose'eja'a mēsarute ca quēcosi'i caquē toyase'eje pa'ye ñama'pē pa'ijē'ē.

<sup>10</sup> Pa'iyē, yecohua'i yē'ēre ñeje cacohua'i. Pai ñato tutu peoquē maca, cui'ne coca canije, ējaērepa cayeje meñerepa paire cama'quēpi, ja yē'ta'a toya daoyese'e jāyē caquē cui'ne cuañequē cayeje caquē toyaquē api.

<sup>11</sup> Jaje cacohua'i maña, iyere yēquē yo'o ja'ñere asani pa'ijajē, yēquē cato jaje pa'ina, yēquē coca case'eje pa'ye, cui'ne so'ore mēsarute pa'ijē toyase'eje pa'ye cui'ne yo'oja'cohua'i a'ē, mēsaru ja're pa'i maca.

<sup>12</sup> Nuñerepa caye, yēquē de'ocohua'i a'ē casicohua'ire yēquēpi iohua'ire cuēcue ñajē cui'ne pa'iohua'i a'ē pañita'a jerepa pa'iohua'i a'ē cuasajē yo'oma'pē pa'iyē. Jaje pa'ijēta'are me pa'i a'ni yē'ē cuasajē sa'ñe cuēcue ñajē pa'icohua'i cato huesēohua'irepa yo'oyepi yo'ojē pa'iyē.

<sup>13</sup> Yēquē yo'oye pa'ina, coa ai jerepa pa'iohua'i a'ē cuasajē sa tēto saipe yo'oye paja'cohua'i a'ē. Jaje pa'ina, yēquē co'amaña neja'to Maija'quēpi iye macaja'a nejē'ē, caquē ña nēocaiji. Jaje pa'ina, ipi yēquēre mēsaru quē'ro Corinto tī'ajē'ē, caquē ñaquēna, tī'ahuē.

14 Jaje pa'ina, yëquëre nejë'ë, ca nëosi macaja'a yo'oyë. Jerepa yo'oma'pë pa'iyë. Jaje pa'ina, yëquëpi ja'në mësaru ja're conì pa'ima'pë patu co'ara'pi. Jaje pati'ñe pa'iota'are yëquëpi du'ru sani mësarute Cristo de'o cocare quëahuë.

15 Cui'ne yëquëre ca nëose'ere sa eta sani yecohua'i nese'ere jioni sihuama'pë pa'iyë, ai jerepa pa'iohua'ipi de'oyerepa nehuë cajë. Coa ai jerepa yëquëre ca nëose'ēja'a yo'oyë, mësarupi Maija'quëre pa'ire paji cuasa tì'ajëna. Mësaru ja're pa'ijë jerepa Maija'quë co'amañare neñu'u cuasajë yo'oyë, yëquëre Maija'quë ca nëose'ejë pa'ye.

16 Cui'ne cuasayë, mësarupi. Pa'ire paji cuasa tì'ajëna, mësaru pa'i yeja Corinto jerepa pa'i ye-jañaje sani huaso coca quëañu'u cajë. Yecohua'i nese'ere jioni, yëquëpi jerepa pa'iohua'ipi de'oye nehuë, cajë sihuayere coejë, cui'ne yecohua'i Maija'quëre necaiyere nerojai hue'ña cacaye pañu'u cuasayë.

17 Jerepa pa'i a'ë cuasaye yëquë pani, jerepa pa'i api cuasajë'ë, Ëjaëna. Jaë api, jerepa pa'i.

18 Jaje pa'ina, Ija'a co'ye de'oquë a'ë caquë cato neñama'quëpi nuñerepa pa'iquë peoji. Coa Ëjaëse'e de'oquë api caquë cato neñasiquëpi nuñerepa pa'iquë api.

## 11

### *Pablo Cui'ne Coa Cacohua'i*

1 Quëcojë dahuëre asajë'ë, yë'ë caye, a'ri maña cuepe cocajë pa'ye, catoje.

2 De'oji, yë'ë cato mësarute oi ai ëseyë, Maija'quë oi ëseye ayepi, mësarute Cristona te'ire huejosil'i

ca nëosi do'ire ëseyë. Jaje pa'ina, nomi tsjo ëmëre yo'oma'core paje pa'iohua'ini, ina isisi'i caquë yo'oyë.

<sup>3</sup> Jaje pa'iquëta'are ca'rayë, añapi io ta'ñe cayepi, Evare cosose'eje pa'ye, mësarute cosocona. Cristore nuñerepa cuasajë sihuayere mësarupi jeoma'cohua'ini caquë.

<sup>4</sup> Jaje ca'raquë ñaquëna, mësar, yecohua'ipi daijë yëquë quëase'eje pa'ye quëama'pë coa ti'ñe pa'i Jesuni quëajëna, coema'pë asayë, mësar. Cui'ne ja'në isi cuañose'eje pa'i joyo peoyere coa ti'ñe pa'i joyore isi cuañojë, cui'ne mësar ja'në asase'eje pa'ye peoyere ti'ñe pa'i huaso cocare quëajëna, sehuojë pa'ijacohua'i a'ë, ti'ñe pa'ie.

<sup>5</sup> Jaje pa'itoje yë'ë cato jaohua'i Jesús jëjo saocohua'i a'ë coa cacohua'i huë'ehuëre pa'ie pañë. Jare cuasayë.

<sup>6</sup> Yë'ëpi de'oyerepa coca ca ti'ama'quë pa'itoje, yë'ë ta'ñe asaye cato jaiye a'ë. Ja asayere mësarute iñohuë, si'aye yëquë yo'ojë pa'iyepi.

<sup>7</sup> ¿Co'aye yë'ë yo'ore mësarute, huaso coca quëa do'ire curi sema'ë, cui'ne mësarute ñese mëoñere caquë yë'ëpi teaye pa'i maca de'oni yo'ore? Pani, co'aye yo'oye pahüë.

<sup>8</sup> Jaje pa'ina, yequë sehuosicohua'i tsisosi curire jiohuë, mësarute necasi'i caquë.

<sup>9</sup> Mësar ja're pa'i maca yë'ëre jopo carayere, cocaijë'ë caquë mësarute sema'ë paë'ë. Paquëna, Maija'quë do'ijë Macedonia daisicohua'ipi cocaë'ë, co'amaña isijë yë'ëre caraye. Mësarute josa yo'oye pasi'i cuasahuë, jare jajese'e yo'oquë pa'ija'quë a'ë.

<sup>10</sup> Yë'ë cato Cristore pa do'ire nuñerepa cayë. Jaje

pa'ina, yè'è si'a Acaya yeja pa'icohua'ire curiquè sèma'è quèase'ere sihuaye sioye ti peoji.

<sup>11</sup> ¿Me yo'oquè jaje caye'ni, mèsaruni oima'è, jaje caye? Pani Maija'quèpi ñaji, yè'è mèsarute oiye.

<sup>12</sup> Iohua'i yo'oyere itire pa'è cajè sihuajè maije pa'iohua'i a'è cañu'u cajè yo'oyere, iohua'i quèco payere jiosi'i caquè yè'è curi sèma'è yo'oyere yo'oquè pasi'i.

<sup>13</sup> Jaohua'i cato Cristo jèjo daocohua'irepa peoye coa i jèjo daocohua'ije pa'iohua'i de'oni cosojè yo'ocohua'i a'è.

<sup>14</sup> ¿Me yo'ojè jaje yo'oye'ni, ai cuasama'pè? Jare i huati èjaèpi huiñaèje pa'irepa miaquèrepa de'oni yo'oquè api.

<sup>15</sup> ¿Jaje yo'oquère sète me pañe'ni, ite necaicohua'ije? Jaje pa'ina, de'o pajè pa'iohua'i de'oni yo'ojè cosoyè, paire. Jaje pa'iquèta'are iohua'i yo'ose'e pa'ieje saì cuañoñe pa'iji.

### *Pablo Ai Yo'ose'e Jesús Jèjo Saoquèpi*

<sup>16</sup> De'oji, tijupè mèsarute ca coñè, te'ije yè'ère cuepequè caji, cuasacohua'i pani coa asajè'è, yè'è mèsarute cuepequè cayeje caquèna, yè'èje a'ri maña casi'i jerepa pa'i a'è cuasaquè.

<sup>17</sup> Iye yè'è jerepa pa'i a'è cuasaquè casi'i caye cato cama'è pa'iyè, mai Èjaèrepa cuañese'epi. Ja cato cayè, coa cuepei cayepi.

<sup>18</sup> ¡Jai pai iohua'i yo'oyere ñajè jerepa pa'iohua'i a'è cuasajè sihuacohua'i pa'ie sète, yè'èje cui'ne yè'è yo'oyere ñaquè jerepa pa'i a'è cuasaquè sihuasi'!

<sup>19</sup> Mèsaru ai ta'ñe pa'iohua'ita'a cuepeohua'i cayere quècojè ai yèjè asayè.

20 Jaje pa'iohua'ipi quëcojë jaohua'ipi jo'ya nerena, mësaru sihuajë cöcayë, mësarute coa co'acohua'ire ñajë yo'ocohua'ini, coa cosocohua'ini, mësarute coe ëaye ñacohua'ini, yequere tsiana të'cajë yo'ocohua'ini cöcayë, mësaru.

21 Yëquë paë'ë, ai tutu peocohua'ipi mësarute jaje yo'oye pasicohua'i. Jaje caye huajëya'ye nëicota'are cayë:

Jaje pa'iquëta'are yecohua'ipi jerepa pa'iohua'i a'ë cuasato yë'ë cui'ne jerepa pa'i a'ë cuasasi'i, iyere cuepei cayeje caquë.

22 Jaohua'i hebreo pa'i a'ë, yë'ëje i a'ë. Jaohua'i Israel pa'i a'ë, yë'ëje i a'ë. Jaohua'i Abraham tsëcapë acohua'i a'ë, yë'ëje i a'ë.

23 Jaohua'i Cristore necaicohua'i a'ë. Yë'ëje jaohua'i necaiye jerepa Cristore necaiquë a'ë. Jaje pa'ina, jaohua'i neñe jerepa nehuë. Cui'ne jaohua'i si'se cuañose'e jerepa si'se cuañohuë. Cui'ne jaohua'i co cuañose'e jerepa co cuañohuë. Jaje yo'oquë si'anëpi ne ju'iñere paë'ë.

24 Judío paipi cinco pa'ye yë'ëre tseajë treinta y nueve pa'ye si'sehuë, tseañerepa si'se mepi.

25 Toasoñe pa'ye tarapi të'cahuë. Cui'ne te'erepa quëna pëapi jeahuë. Toasoñe pa'ye yë'ë sai yohuëapi ea dutupi. Ea du'ina, duni juni tëjiquë te'e ñami cui'ne te'e mu'se jai tsiayare coa huahuahuë.

26 Si'anë cui'yese'e yo'oquë ñasiquë a'ë, tsiaya duni jut'iñe pa'ye, ñaohua'ina huahuo'ñe pa'ye, cajeohua'ipi huati'ñe pa'ye, ti paipi huati'ñe pa'ye, jai daripë acohua'ipi huati'ñe pa'ye, tsio huë'ña acohua'ipi huati'ñe pa'ye, jai tsiayana duni

ju'ti'ñe pa'ye, Maija'quë do'ijë a'ë, coa cacohua'ipi huati'ñe pa'ye yo'ojëna ñaquë tëto saisiquë a'ë.

<sup>27</sup> Cui'ne, jaiye jë'joye nëina neñe, cui'ne ai yo'oye tëto saë'ë. Jaje pa'ina, yequere ti caïma'ë tëtosaë'ë. Yequere ao peoquëna, cui'ne oco ëa ju'i tëtosaë'ë. Yequere ti aïma'quëpi coa paë'ë. Yequere caña peoquëna, sësë ju'i ai yo'oquë paë'ë.

<sup>28</sup> Iye cui'ne yequë co'amaña jerepa co cuasaquëna mu'seña ñape yë'ëna dëquyeje pa'ye tomequëna, si'a hue'ña sehuosicohua'i me pa'iyë'ni cuasaquë co'a ju'i pa'iyë.

<sup>29</sup> Jaje pa'ina, yequë te'i tutu peoquë pa'ito yë'ëje i jare cõni te'e ai yo'oquë tutu peoquë pa'iyë. Co'ayena ne taosiquë pa'ito yë'ë joyo a'siyerepa oiyë.

<sup>30</sup> Jerepa pa'i a'ë cayepi nëiñe pa'ito yë'ë teaye pa'i tutu peoyere iñosi'i, yë'ë cayepi.

<sup>31</sup> Jaje pa'ina, Diosu mai Ëjaë Jesucristo pëca ja'quëpi yë'ë caye nuñerepa caji caquë asaji, si'anëpi de'oquëre pa'ni cajë sihuaquëre papi.

<sup>32</sup> Yë'ë Damascore pa'i maca, romano pai ëjaë Aretasre cõcaiquëpi, pai ëjaëpi, yë'ëre tseaja'cohua'ire jai daripë eta sa'noana soldado paire në'quepi.

<sup>33</sup> Jaje yo'ouna, yecohua'ipi yë'ëre do'rohuëna ayani jai daripë tëhuopa etaye ña sa'roja'a casarena, catihuë, Aretasre.

## 12

### *Maija'quë Pablöre Iñose'e*

<sup>1</sup> Do'i peoye a'ë, co'ye de'oyerepa yo'oquë a'ë cajë sihuaye. Jaje pa'iquëta'are mësarute quëaye

yëyë, yë'ëre Èjaë huëo cani ñañeje pa'ye cui'ne yequë mu'seña pa'i ja'ñere ñño'se'e.

<sup>2</sup> Pa'iji, catorce ometëca te'ire Cristo sehuoquëre ma'tëmona, toaso pëpë acona sase'e. Iye yo'ose'ere asaquë a'ë, yë'ë. Si'a capë sa cuañosiquë pa'ini, panita'a joyose'e sa cuañosiquë pa'ini huesëyë. Ja cato Maija'quëse'e asaji.

<sup>3</sup> Jaje pa'iquëta'are asayë yë'ë cato, jaëte si'a capë quë'ire, panita'a joyose'e sasiquë pa'ini huesëyë. Coa Maija'quëse'e asaji.

<sup>4</sup> Ite cato Maija'quë tsiona sapi. Saëna, jaronasapi, ti pai asani i case'eje pa'ye ca ti'añe peoyere pare.

<sup>5</sup> Yë'ë jaëje pa'ire pani, jerepa pa'i api caquë sihuacati'ñe pa'i a'ë. Yë'ëja'a co'ye jerepa pa'i a'ë caquë sihuayeta'a pasi'i. Jaje pa'iquëta'are sihuasi'i yë'ë ne ti'a ma'ñere.

<sup>6</sup> Jaje pa'iquëta'are, yë'ëpi jerepa pa'i a'ë caquë pani, coa cuepequë caye pa'ñe pa'i a'ë, jare nuñerepa cajuquë pa'i do'ire. Jaje pa'iquëta'are iyere yëyë, yecohua'ipi yë'ëre jerepa pa'i api cuasama'cohua'ipi, iohua'i yë'ë yëhuose'ere asayepi cui'ne yë'ë pa'iyere ñañepi cuëcujë.

<sup>7</sup> Jaiye ñño'se'ere paquëta'a pa'ina, yë'ëpi jerepa pa'i a'ë cuasama'quëni caquë, yë'ëre josa yo'oja'core huati ëjaë hua'jo ñacajë pa'io'ipi yë'ë capëna ai yo'oyere miuje pa'io'ire ne neöpi.

<sup>8</sup> Jaje neina, ai yo'oquë toasoñe mai Èjaëre, ja ai yo'oye nejocajë'ë caquë sei'ë.

<sup>9</sup> Seina, i'ipi capi: "Yë'ë më'ëre oiyepi tsoe de'o'ji, yë'ë tuture tutu peocohua'ija'a de'oyerepa ñño'ne pa'iji" capi. Jaje pa'ina, sihuayë, yë'ë tutu peoyeja'a Cristo tuture ñño'ne pa do'ire.

10 Jaje pa'ina, sihuayë, tutu peoyere, pëpoyere, co'amaña carayere, huani jeoñu'u cajë yo'oyere, cui'ne Cristo do'ire necai ai yo'oyere. Jaje pa'ina, yë'ëpi tutu peoquë pa'i maca, ja maca jerepa tutu quë'i pa'iyë.

*Corinto Sehuosicohua'ire Pablo Co'a Ju'iñe*

11 Mësarupi cacaima' do'ire, cuepei cayeje cahuë, mësarute. Mësarupi yë'ëre de'oquë api cacaiye pa'iji, pañi yë'ëja'a co'ye. Yë'ë mësarute ye'yacohua'i huë'ehuëre pa'iyë pañë, do'i peoquë maca pa'inije!

12 Jaje pa'ita'a, yequë mu'se pa'i ja'ñe iñoñepi, pa'i yo'o t'a ma'ñe yo'oyepi, jaiye de'o co'amaña mësarü ja're pa'i dahuëre quëcoquë yo'o iñose'epi, japi iñoñuë, Jesús jëjo daoquërepa yë'ë pa'iyë.

13 Jaje pa'iquëta'are yequë huë'ña sehuosicohua'ipi jerepa de'oyerepa necaise'e payë cuasayë. Mësarü coa mësarute necaiye tayo yo'ose'e pa'ito iyese'e a'ë: Yë'ë carase'e mësarute sema'ë paë'ë. Ja tayo yo'oyere ai cuasama'pë sai tocaiyeje pa'ye de'oye cuasajë oni yejejë'ë, yë'ëre.

14 Mësarute toasöñe acore do'i sai ja'ñere yure ne de'huaquë pa'iyë. Yureje mësarute dëquëyeje pa'ye yo'oma'ë pa'ija'quë a'ë. Mësarü curire pasi'i caquë yo'oma'ë pa'iyë. Yë'ë cato mësarüni caquë yo'oyë. Jaje pa'ina, pëca ja'quëohua'ipi mamajëre isija'a curiquë tsi'socohua'i a'ë, pañi mamajëpi pëca ja'quëohua'ire isi ja'ñere tsi'soye.

15 Jaje pa'ina, yë'ëpi mësarute ai oina, mësarupi yë'ëre a'ri maña oitoje, yë'ë de'oye cuasa do'ipi si'aye yë'ë curi paye sai saosi'i, cui'ne yë'ë tutu



mañaje ne saosi'i caquë sihuaquë yo'oyë, mësaru joñoa de'oye pa'iyere caquë.

16 Nuñerepa cayë, yë'ë mësarute dëquëye yo'oma'ë paë'ë. Jaje pa'iquëta'are yecohua'i mësaru acohua'ipi cayë, yequëre coa i tañe cosoyepi yo'oquë se'queoje pa'iona, eo nëopi.

17 ¿Yë'ë mësaru ñato, yë'ë yëyere cosoquë nesi'i caquë jaohua'ire jëjo saore?

18 Titore do'i mësarute sani ñajaquë caquë seni cui'ne i ja're coní yequëre Maija'quë do'iquëre jëjo saohuë, ¿jëjo saosiquëpi Tito sani mësarute i yëyere nesi'i caquë cosoquë yo'ou? ¿Yëquëre te'e joyopi cui'ne nëiñe isiquëna, cayaohua'i si'a yë'quë macarepa yo'oma'pë pate, mësaru ñato?

19 Yequë mësaru ca'ra'ñe pa'iohua'i a'ë tayo yo'ose'ere, yëquë iti ñasicohua'i ña hue'ñana ca de'huañu'u cajë cayë. Jaje cajë caye pañë, yëquë cato Maija'quë ña hue'ñana cayë, Cristo acohua'i sête. Jaje pa'ina, si'aye yëquë caye cato, mësaru Maija'quë do'ijë joyo pa'iyë jerepa ñese mëi ja'ñere cocañu'u cajë caye a'ë.

20 Jaje pa'iquëta'are ca'rayë, mësarute ñasi'i caquë sani tiñe pa'ijëna, ña quëquëyere cui'ne mësarupi yë'ëreje tiñe pa'ina, ñañere. Ca'rayë, te'e cuasaye peoquëna, pëtise'e, te'i payese'e, co'a cocase'e, yecohua'ire cue'cuyese'e, jerepa pa'i a'ë cuasayese'e, cui'ne coa co'a tiyapë pa'iyese'e pa'líma'quëni caquë.

21 Jaje pa'ina, cui'ne tijupë do'i ñasi'i caquë saquëna, yë'ë Diosupi huajëya'ye nëiñe nema'quëni mësaru yo'oyere ñaquëna, caquë ca'rayë. Ja maca mësaru tsoe hue'ña acohua'ipi tajojëta'a ti jëoma'pë, jai paí si'si yo'ojë coa

nomiohua'ire cui'ne ěměohua'ire yo'ojĕ pa'iyere,  
cui'ne ja'nĕ yo'ojĕ sĕo mease'ere jĕoma'pĕ  
pa'iyere, iño oema'quĕni caquĕ ca'rayĕ.

*Yĕhuoye Cui'ne Pĕpa Tĕjijerepa*

## 13

<sup>1</sup> Iye do'i saise'e pa'ija'coa, yĕ'ĕ mĕsarute toasoñe  
acore do'i saico. Te'ire sañope coca caye pa'ito ne  
de'huaye pa'iji, cayaohua'i panita'a toasocohua'i,  
iti ñasicohua'ipi cajĕna.

<sup>2</sup> Jaje pa'ina, tijupĕ yure ca coñĕ, so'ore pa'i.  
Yĕ'ĕ ja'nĕ cayaye acore do'i saisi maca mĕsarure  
pana ñaquĕ case'eje ca coñĕ. Ja'nĕ co'aye yo'ojĕ  
pa'isicohua'ire, cui'ne si'aohua'ire cayĕ. Yĕ'ĕpi co'i  
cosiquĕ pani, mĕsaru tayoye coa ñaņe pa'ija'quĕ  
a'ĕ.

<sup>3</sup> Ja maca jaje yĕ'ĕpi cani iñoquĕna, mĕsaru  
asaja'cohua'i a'ĕ. Yĕ'ĕ caye cato Cristo case'e a'ĕ.  
Ja case'epi mĕsaruna tutu carajaiņe peoji, Cristo  
tuturepa quĕ'i coca'ĕ.

<sup>4</sup> Jaje pa'iquĕta'are Cristore tutu peoquĕre  
quĕni huani jĕoņeje huani jĕohuĕ. Huani  
jĕosicohua'ita'are Maija'quĕ tutupi huajĕquĕre  
papi pa'iji. Jaje pa'ina, cui'ne yĕquĕje i tutu peoquĕ  
pa'ise'e ayere conĭ pa'icohua'ije i ja're tsioni pa'i  
do'ire Maija'quĕ tutupi pa'ija'cohua'i a'ĕ, mĕsarute  
necaiyere cajĕ.

<sup>5</sup> Mĕsaruja'a ñare pajĕ co'ye neņajĕ'ĕ, nuņerepa  
yĕquĕ Maija'quĕ pa'ire paji cuasayere pa'iye cajĕ.  
Neņajĕna, Cristopi mĕsaru ja're conĭ pa'ima'quĕ  
pa'ito coa cacohua'i pa'iyĕ.

6 Jaje pa'ina, cuasayë, mësarupi neñasicohua'i pa'ijë, yëquëreje tayoma'pë de'oyerepa pa'icohua'i a'ë, asa tì'ajajë cajë uteyë.

7 Jaje pa'ina, mësarupi co'aye yo'oma'pë pa'ijajë cajë Maija'quëre secacaiyë, mësarute. Yëquëpi jerepa pa'iohua'ipi ne tì'ahuë cajë señe pañë. Coa ai jerepa yëquë cato, mësarupi de'oye yo'ojajë cajë señë. Yëquëpi tayose'leje pa'iohua'i ña cuañotoje.

8 Yëquë cato nuñerepa yo'oyere sañope yo'oma'cohua'i a'ë. Coa ai jerepa nuñerepa yo'oyere ñese cocaicohua'i a'ë.

9 Jaje pa'ina, sihuayë, yëquëpi tutu peocohua'i pa'ijëna, mësarupi tutu quë'iohua'i pa'ito. Jaje pa'ina, mësaru de'ocohua'irepa pa'iyë tì'añere cajë, Maija'quëre si'anë secacajë pa'icohua'i a'ë.

10 Jaje pa'ina, yë'ë ja yë'ta'a mësaru quë'ro saima'në iye toya ja'hua toya saoyë, yë'ë mësaru quë'ro tì'asi maca, yë'ëre Ëjaëpi mësarute ne-joma'ë, joyo pa'iyere ñese mësarute mëocaija'a tutu isise'epi, jëayerëpa yë'ë cuañequërepa pa'i tutupi mësarute cayere coequë, jaje yo'oyë.

11 De'oji, yure ca tējihuë. De'oye sihuajë pa'ijë'ë. Mësaru pa'iyepi de'ocohua'irepa pa'iyë ponëñere yo'ojë pa'ijë'ë, yë'ë case'ere pa'ijë'ë, cui'ne jo'cua de'oye sañe de'oye yo'ojë pa'ijë'ë. Jaje pa'ijëna, Maija'quë paire oiquëpi, cui'ne jo'cua de'oye pa'iyë isiquëpi mësaru ja're pasipi.

12 Sa'ñe pëpajë sihuajë'ë, si'si peoyere papi.

13 Mësarute pëpa saoyë, si'ahua'i Maija'quë do'ijëpi.

14 De'oji. Mai Ëjaë Jesucristo, coa isiyepi, Maija'quë mësarute oiyepi, cui'ne Maija'quë joyo

si'anë mësaru ja're pa'iyepi, si'aohua'ire mësarute  
pa'ijaquë.

**Maija'quë Huajë Ca Nëose'e**  
**New Testament in Secoya (EC:sey:Secoya)**

copyright © 2012 Wycliffe Bible Translators, Inc.

Language: Secoya

Translation by: Wycliffe Bible Translators, Inc.

Secoya [sey], Ecuador

**Copyright Information**

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Secoya

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022

995e68c5-fe57-54e6-bf8e-0637526d3f7d